

Kondom: Ruleta Ruso

"Birginidat" ta un palabra kasi desconosí den nos komunidad. Maske nos sa ku e palabra "birgen" ta referí na un persona ku nunca tabatin relashon seksual i nos ta usa e palabra kasi eksklusivamente di mama di Hesus. Ma ta Maria so ku tabata birgen? Echu ta ku kada persona ta nase birgen. Talbes nos por usa e palabra pa ku e sekso femenino, ma e tambe ta aplikabel pa hende hòMBER.

Ma birginidat no ta popular awendia. Nos tin e idea ku un hoben ku ta birgen ainda no por ta normal. No ta un shòk pa nos mas ora un hobensita di 13 aña ta sali na estado. Nos ta strañá si un pareha por apstené di sèks te dia di kasamentu. Nos tin e impreshon eroneo ku tur hoben ta hasi sèks awendia.

Pesei nos ta rasoná ku ta mehor pa prepará nos hobennan pa hasi sèks na un forma responsabel, pa prevení e konsekuensianan penoso di embaraso i AIDS. Nos ta bombardiá nan ku promoshon di kondom di tur banda; di parti di dosentenan na skol, spesialistanan di seksualidat, charlanan, bukinan, revistanan, foyetonan, i pelikulanen. Nos ta instalá mashin na varios sitio pa fasilitá kumpramentu di e "blas" di latèks. I asta mayornan ta enkurashá nan yunan pa usa kondom.

Ma, mayornan, kondomnan di bèrdat ta loke bo ke promové? Bo sa den e profundidat di bo kurason ku relashon seksual fuera di matrimonio ta piká. Bo sa ku Dios tin rason ora e ta bisa "Hui fornikashon...es ku ta hasi fornikashon ta kometé piká.." (1 Corintionan 6:18). Bo sa ku bo no ke pa bo yu presioso hiba un bida immoral. Pues dikon bo no ta promové apstenensia te matrimonio?

Kisas ta pasobra bo ta haña ku awendia ta mehor pa promove e uso di kondom komo ku (segun nos ta pensa) un hoben tòg lo no apstené di relashon seksual. Bo yu ta mas seif si bo ta enkurash'é pa usa kondom.

Alkontrario, ta peligroso pa promové uso di kondom! Dikon? Suponé ku bo ta bisa bo yu pa e evitá tur relashon seksual promé ku matrimonio, pa e warda su kurpa pa un persona so, ku ta peligroso pa drumi ku diferente partner seksual. Anto despues di bis'é tur esei bo ta dun'é un kondom. Kiko bo ta komuniká di bèrdat? Bo ta enkurash'é pa e no skucha bo konseho. Bo ta enkurash'é pa e hasi sèks tòg. Bo ta dun'é e impreshon ku maske sèks fuera di matrimonio ta peligroso, tòg abo (un mayor ku lo no promové algu malu pa bo yu) ta kere ku e *si* por logra tin "safe sex." Bo asta ta dun'é e impreshon ku sèks fuera di matrimonio tòg ta un bon kos, algu ku e por gosa bai gol! Esei ta un mensahe masha destruktivo pa duna bo yu. Pero ora bo ta enkurashá bo yu pa usa un kondom, esei ta presis loke bo ta komuniká.

Pensa un ratu! Resultado di un estudio a wòrdu presentá na e di tres konferensia di AIDS, na aña 1987. Hende kasá ku un portadó di e viro HIV (for di kua por kontagiá AIDS) a wòrdu studiá. Dentro di 1½ aña, 1 di kada 6 partner salú (esta 17%) a kontagiá e viro *maske nan a usa kondom*.

Ruleta Ruso ta un "wega" peligroso. Reglanan di e wega ta simpel. Bo ta pone solamente un bala den un di e seis burakunan den e barí di un revòlver, spen e barí, pone e revòlver na bo kabes i tira. Bo tin 1 chèns den 6 pa muri. Lo bo ta despuerto di hunga e "wega" ei? Sigur ku nò! E rísiko ta muchu grandi. Ma ora bo ta bisa bo yu pa usa kondom, bo ta enkurash'é pa hunga un "wega" ku tin mes tantu rísiko...i por ta mes fatal.

Ta tempu pa nos stòp di hunga Ruleta Ruso ku nos yunan! Ta tempu pa nos stòp di hunga e wega peligroso di kondom! Ta tempu pa bo kuminsa promové birginidat i apstenensia te matrimonio. No pensa ku bo ta gasta bo rosea pòrnada promoviendo moralidat. Ta bèrdat, algun lo no skucha. Ma no ta bèrdat ku tur hoben ta seksualmente aktivo. Nan por resistí kontra e tentashon di sèks. I pa esnan ku a frakasá, nan por kuminsá di nobo, apsteniendo di sèks te matrimonio.

Esei ta loke nos mester siña nos yunan. Kondom nò! Birginidat i apstenensia te matrimonio si!